

Di desperdicio pa alimento:

Con Aruba por transforma awa di efluente den un fuente di irigacion

ARUBA ta conoci internacionalmente pa su uzo avansa di Reverse Osmosis (RO) na WEB. **E resultado:** Awa di bebe di un calidad sin igual den Caribe, asina purifica cu e ta ricibi elogio rond mundo. Pero mientras e enfoke aki ta ideal pa hogarnan y turismo, tin un oportunidad grandi den un otro parti di e ciclo di awa cu hopi biaha ta ser ignora: **E awa di efluente for di nos plantanan di purificacion di awa.**

Enbes di simplemente deshaci di e awa residual purifica aki, Aruba por probecha y duna e producto aki mas balor. Door di combin'e cu RO, tecnologia UV y energia solar, ta crea un fuente nobo di awa cu ta perfectamente adecua pa agricultura.

Awa di Efluente: Di un carga pa un materia prima

Awa di efluente—e awa cu ta resta despues di e proceso di purificacion—ta un producto creciente rond mundo. Cu e tratamiento adicional corecto, e awa aki por ser uza di nobo na un manera sigur. Pa calidad di awa di bebe, esey hopi biaha ta mucho caro of complica. Pero pa irigacion den agricultura, e normanan ta menos estricto.

Door di mira efluente no como desperdicio sino como un materia prima, Aruba por atende cu dos reto na mes momento: E uzo di nos awa di bebe costoso den agricultura, loke ta hisa e gastonan di produccion enormemente, y e dependencia riba cuminda importa.

RO + UV: Un combinacion di oro

Un instalacion di RO por kita salo, kimico, y metalnan pisa for di awa di efluente. Unda ta necesario, e proceso



aki por ser ahusta pa ta mas simpel of eficiente cu esun pa produccion di awa di bebe, pasobra e meta final ta agricultura.

Ademas, un tratamiento cu UV por neutralisa bacteria y virus sin uza cloro of otro kimico. UV ta simpel, relativamente barata y confiabel. Asina ta crea awa cu no ta presenta ningun riesgo pa salud di cosecha, tera of consumi-dornan.

Solo como un bentaha adicional

Aruba ta dispone di un abundancia di luz di solo. Esaki por sirbi como fuente di energia pa pompnan y sistemanan di filtracion, loke ta baha e gastonan operacional di un circuito di awa pa irigacion asina considerablemente. Enbes di combustibel fosil, energia solar por suministra un gran parti di e coriente necesario, haciendo e proyecto no

solamente economicamente viabel, pero tambe sostenibel.

Rol ehemplar den region

Hopi isla den Caribe ta lucha cu retonan similar: Gastonan halto di awa di bebe, agricultura limita y dependencia riba importacion. Si Aruba bay dilanti cu un modelo hibrido den cual ta uza efluente na un manera inteligente, e por asumi un biaha mas un rol ehemplar den region—net manera el a haci pa decadanan caba cu produccion di awa di bebe.

Awa di efluente no ta un problema, sino un oportunidad. Door di combin'e inteligentemente cu RO, UV y energia solar, Aruba por produci awa cu ta precies bon pa agricultura. **E resultado:** Menos desperdicio, mas seguridad di alimento, y un imagen sostenibel cu ta haci e isla un biaha mas un pionero den Caribe.